

**Akileraartarnermut Aqutsisoqarfiup najoqqutassiaa.****Sammissaq:****Soraarnerussutisiaqarnissamut aaqqissuussinerit ilaannut, Kalaallit Nunaanni angerlarsimaffeqanngitsunut akiliinermut tapiissutit**

Akileraartarnermut Aqutsisoqarfiup matumuuna nalunaarutigissavaa, Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaanni nr. 7, 6. juni 2016-imeersumi § 2 malillugu tapiissutit tunniunneqartut aningaasarsianit akileraarutit pillugit inatsimmi § 75, imm. 5 naapertorlugu Aningaasarsiatut A-tut isigineqartut.

Tunuliaqutaasut

Soraarnerussutisiaqarnissamut aaqqissuussinernut nunani allaniittunut akiliutit akileraaruserneqartar-nissaat Inatsisartut akuersissutigaa. Tamatumunnga peqatigitillugu ikaarsaariarnermut atatillugu aaq-qissuussisoqarnissaa inatsisartunit akuersissutigineqarpoq. Aaqqissuussineq taanna malillugu piuma-saqaatit aalajangersimasut malillugit inuit ukiuni arlalinni tapiissutisisarsinnaapput. Nunani allani so-raarnerussutisiaqarnernut akileraarusersuisarneq paasisaqarfiginerussaavat Akileraartarnermut Aqut-sisoqarfiup nittartagaa www.aka.gl aqqutigalugu.

Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi § 39 a, imm. 1-imi imm. 2-milu piumasaqaatinik naammassinnittunut soraarnerussutisiaqarnernut akili-uteqarnermi piffissami 2017-2021-mi Namminersorlutik Oqartussat tapiissuteqartassapput.

Tapiissutit akileraaruteqaataassapput.

Tapiissutit annertussusiat:

Ukioq:	2017	2018	2019	2020	2021
Tapiissutigineqartut:	5 %	5 %	5 %	3 %	3 %

Piffissami 2017-2019-imi tapiissutit qaammammut annerpaamik 420 kr.-usinnaapput piffissamilu 2020-2021-mi qaammammut 250 kr.-usinnaallutik.

Namminersorlutik Oqartussani taakkulu suliffeqarfiutaanni kiisalu kommunini sulisunut tapiissutit sulisut aningaasarsineranni tunniunneqartarput.

Tapiissutisisinnaatitaasut allat qinnuteqarnermikkut tapiissutisisarput. Qinnuteqarnermi periusissat il. il. pillugit paasisutissat Akileraartarnermut Aqutsisoqarfiup nittartagaatigut tamanut saqqummiunneqassapput.

Tapiiffigineqarnissamut piumasaqaatit

Tapiissutit taamaallaat tunniunneqarsinnaapput inunnut, makkununga



- a) ulloq 31. december 2016 Kalaallit Nunaannut tamakkiisumik akileraartussaataitaasunut,
- b) qinnuteqarnerup nalaani aamma/imaluunniit tunniussinerup nalaani kipiffeqanngitsumik sulii tamakkiisumik Kalaallit Nunaannut akileraartussaataitaasunut,
- c) soraarnerussutisiaqarnissamut inuunermullu sillimmatinut soraarnerussutisiaqalernissamut aningaasaateqarfimmi imaluunniit inuunermut soraarnerussutisiaqalernissamullu sillimmasiisarfimmi Kalaallit Nunaata avataani pilersinneqarsimasunut 2016-imi akiliuteqarsimasunut, aamma
- d) 2016-imi akiliutigisimasanut tunngatillugit ilanngaateqarsinnaatitaasimasunut imaluunniit akileraaruteqaataasussanik nalunaarsuinermi ilannguneqartussaannigitsunut ilaatinneqartunut.

Toqqammavigisaq(t) / Inatsisitigut tunngavigisat

Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaanni nr. 7, 6. juni 2016-imeersumi § 2.

Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi § 75, imm. 5.